

Segun autor Yolanda Croes

Buki “E Fucu di e Piedra Pretonan” ta un advertencia pa e hobennan



ORANJESTA – Aunke e buki “E Fucu di e Piedra Pretonan” di sra. Yolanda Croes a subi mercado varios siman pasa caba, apenas diamars anochi a tuma luga e acto oficial di su presentacion na departamento di Arubiana/Caribiana di Biblioteca

Nacional Aruba. E buki aki ta conta e historia di un hoben “yiu di saco” cu a infiltra den e mundo di spirito.

Sra. Croes no ta un persona desconoci den mundo di literatura. El a yega di skirbi varios buki caba. Ademas e ta

un licenciado, docente den idioma y e ta un traductor huramenta.

Autor y obra

Apenas un par di siman pasa e obra aki a conoce luz di dia y ya caba el a bira practicamente un best seller. Sr. Yuby Nahar a realisa e presentacion di e buki unda no solamente el a destaca e interes cu e buki aki ta lanta cerca e lector, sino e cualidad di su autor. “Mi ta gusta buki cu ta gara mi for di cuminsamento te final, y na final mara cu tabatin mas. Y esaki ta un di nan”, asina el a bisa.

Sr. Nahar a referi na varios revista cu a yega di circula na Aruba unda tabata destaca e autornan mas importante di antes. Un di nan tabata e revista “Watapana” cu tabata enfoca riba literatura e tempo aya Antiano. E ta haya cu a yega tempo pa nos tin un revista di e mesun caracteristica aki, y pone den dje e autornan cua produci obran-



an durante e ultimo decada, pero nunca nan nombrenan no a wordo nombra mas. Esaki a pesar –segun sr. Nahar- cu nan ta traha y produci y te hasta hopi di nan buki ta na scol, “pero nan no ta existi”. Sr. Nahar a compara sra. Yolanda Croes como un di e autornan grandi di awendia comparabel cu e autornan grandi di antes.

Sra. Yolanda Croes a laga sa

cu e buki aki ta un advertencia pa e hobennan cu ta purba drenta den mundo di spiritismo y talbes nan no por domina cierto momento loke ta pasa cu nan. Ta e situacion actual caminda spirito ta wordo yama conoci bou di hobennan como “Charlie Charle Challenge” cu tin mayornan hopi preocupa. “E por bay hopi leu.. Esun cu ta lesa e buki sa kico mi kiermen”, el a bisa. □